

VIJEĆE ZA REGIONALNU SARADNJU RADNA GRUPA ZA KULTURU I DRUŠTVO Osnovne informacije

Strategijom i programom rada Vijeća za regionalnu saradnju (RCC), koju su u junu/lipnju 2010. godine potvrdili šefovi država i vlada zemalja članica Procesu saradnje u Jugoistočnoj Evropi, propisuje se da će, u skladu sa odlukom ministara kulture zemalja Zapadnog Balkana, RCC preuzeti ulogu koordinatora u novoj fazi Ljubljanskog procesa nakon 2010. godine (Ljubljanski proces II). Proces podržavaju Evropska komisija i Vijeće Evrope.

Strategija RCC-a predviđa da će RCC, u saradnji sa Vijećem Evrope i Evropskom komisijom, formirati Radnu grupu (RG) za kulturu i društvo, te imenovati stalni sekretarijat u cilju preuzimanja upravljanja Ljubljanskim procesom i aktivnosti na prikupljanju finansijskih sredstava, te da bude partner nacionalnim radnim grupama koje će se formirati u svakoj od zemalja regiona.

Cilj Radne grupe za kulturu i društvo je promocija regionalne saradnje u oblasti kulture kroz stvaranje platforme za dijalog relevantnih zainteresiranih strana. Još jedan cilj je dobijanje što je više moguće koristi od ulaganja u kulturu kroz njen doprinos održivom ekonomskom i društvenom razvoju i to tako što će se osigurati usklađenost sa drugim aktivnostima koje se promoviraju na regionalnom i državnom nivou. Radna grupa za kulturu i društvo bit će odgovorna za osiguravanje političke podrške realizaciji posebnih razvojnih projekata, uključujući i njihovu promociju, jačanje saradnje između korisnika, razvoj partnerstava, te osiguranje i finansijskih sredstava i održivosti.

Završene su pripreme za zvaničan početak projekta pod nazivom „Podrška Ljubljanskom procesu II – rehabilitacija našeg zajedničkog nasljeđa“. Potpisan je protokol između Vlade Crne Gore i Sekretarijata RCC-a u vezi sa Sporazumom o državi domaćinu Sekretarijata Radne grupe Vijeća za regionalnu saradnju za kulturu i društvo. Radna grupa RCC-a za kulturu i društvo formirana je na osnovu imenovanja koja su dale relevantne nacionalne institucije i međunarodne organizacije. Odabrana su tri člana Sekretarijata RG i potpisani su ugovori za II fazu Ljubljanskog procesa između Evropske komisije, s jedne, i RCC-a i Vijeća Evrope sa druge strane.

Provedba projekta počinje konstituirajućim sastankom Radne grupe RCC-a za kulturu i društvo, 23. juna/lipnja 2011. godine, na Cetinju. Konstituirajućim sastankom će se uspostaviti Radna grupa RCC-a za kulturu i društvo, otvoriti Sekretarijat RG i imenovati predsjedavajući i kopredsjedavajući.

Članovi Radne grupe RCC-a za kulturu i društvo su visoki zvaničnici iz relevantnih institucija vlasti zemalja članica RCC-a iz Jugoistočne Evrope, predstavnik Sekretarijata RCC-a, predstavnik Vijeća Evrope i predstavnik Evropske komisije. Radnu grupu vodi predsjedavajući koje se bira iz redova članova. Sve odluke radne grupe će se donositi konsenzusom. Sekretarijat RG je odgovoran za tehničko upravljanje njenim aktivnostima. Djelovat će kao sekretarijat projekata, ali i dnevnog praćenja aktivnosti. Sekretarijat će preuzeti poslove kako bi se ostvarili ciljevi projekta i potakao uspješan prenos Ljubljanskog procesa u region. Prostorije Sekretarijata će se nalaziti na Cetinju, Crna Gora.